

# Ignazi e Theodosia Venzin-Deragisch, Rueras



(Corr.) Gl'ei bein ina singularitat che ins sa scriver in necrolog el medem temps per dus conjugals. Ussa ei quei il cass per ils dus defuncts: il Nazi Venzin e sia consorta Dosia.

Ignazi Venzin ei naschius a Rueras ils 4 da fenadur 1906 sco fegl da Vigeli Venzin e Barla, nata Giger. Cheu ha el era frequentau sis classas dalla scola primara e lu duas classas egl institut «Löwenberg» (casti) a Schluein. Quella affonza ha denton gia baul giu per il Nazi e ses fargliuns, sis soras ed in frar, ina brava umbriva e largia, caschunada entras la prematura mort da lur mumma il december 1919. La glisch dalla carezia materna fuva stezza. Bein ina nauscha frida per in bab cun otg affons dils quals il Nazi fuva il grond e veva pér 13 onns.

Finida la scola, ha il Nazi nuota giu letgas ed ei sefatgs nizeivels el pign menaschi puril da siu bab, che fuva da gliez temps aunc s'engaschaus sco president communal. Sulet dad in' onn raschunava el cun plascher: dalla stad che siu bab veva schau ira el ad alp enta Maighels. Starler grond enta Maighels, quei veva plaschiu ad el. Buobs veva el giu il Toni Berther (pli tard ustier dil Milar) e lu il Placi Deragisch. Tgisà sch'el ha forsa entupau la sora del Placi, la Dosia, sia futura consorta l'emprema ga enta Maighels? Gie, las vias terrestras han savens da tuts carauns e crests! Seigi ch'il Nazi vevi entupau sia Dosia enta Maighels ni orasin «Gionda», ils 8 da november 1932 ha el menau ella a casa sco spusa. Els ein secasai en la habitaziun dadens dalla casa dalla posta a Rueras en la casa, nua che tuts - el e ses fargliuns - ein stai naschi.

E la Dosia, danunder derivava ella? Feglia digl Emmanuel Deragisch da Bugnei, e consorta Tresa Schmet (Lu scrivevan aunc tuts ils «Schmids» Schmed ni Schmet). Il Manuel fuva scrinari e pur e habitava sin Gonda. Quels han tratg si otg affons cun la lavur e fadigia da lur bratscha. E strusch miez carschi, han tuts affons giu da segidar per il paun da mintgadi. La scola ha la Dosia absolviu a Sedrun - tuttas otg classas. Cun 16 onns cattein nus ella gia en la Molinera a Termin en plaza, 1927/28 en plaza a Turitg eav. Ed il sura numnau onn 1932 ha ella, probabel bein bugen, dau triev al Nazi e fundau famiglia a Rueras.

Il Nazi, sco fegl vegl, ha surpriu il muvel e fatg da siu bab, e fatg il pur sin agen quen. Ils anno trenta, onns nua che far il pur era nuota maneivel. Prezis miserabels, savens strusch da vegnir naven cun ils animals da fiera. Cheu deva ei mo ina sligiazun: Viver en sempldad - ed il Nazi e la Dosia han giu neginas autras letgas che da far quei. Lavur e spargnar - e spargnar. E tonaton han els tratg si tschun affons: 3 fegls e duas feglias. Quels han gia baul stuiu s'engaschar, segidar e fadigiar, sco pasturs, 10 onns sco calusters a Rueras. 1963 ha il Nazi giu surpriu la centrala da latg a Rueras. Cheu eisi semussau ch'il Nazi veva in dun tut special da chischar.

Igl unviern fuva el era in tschercau mazler, enzatgei che fuva fetg apprezziau dils vischins. Aschia ha el sia veta ora stuiu senezegiar da scadina fadigia. En quels onns ha ei aunc - era per el - giu num: far survetsch activ - gest sco ils auters.

Ses affons han els - tier tutta paupradad - schau emprender mistregns - tuts

deno in - ina caussa che ei da lezs temps nuota stada aschi leva, mo ina buna premissa per la veta futura. Culs onns ein denton era quels sgulai ora in suenter l'auter. Il puresser ha el menau vinvon aschia sco el ha pudiu - entochen 1971. Sia consorta ha dapi igl onn 1965 pitiu vid la sanadad ed ei dapi 1975 schizun stada el carr da rodas. Cun carezia e premura han els supportau quella greva sort en pazienzia. Selamentar fuva moda ni dil Nazi ni dalla Dosia. Aschia ha il consort fatg onns ora il tgirunz e teniu casa cun la mala sauna. Igl onn 1988 e 1989 ha ei denton era entschiet a sgurdinar cun la sanadad dil Nazi. Pliras gadas ha el stuiu serender el spital - per pigns intervals. La primavera vargada eis ei adina vegniu mender ed ils 17 da matg ha el rendiu sia olma a siu Scaffider. Ruasseivels e quiets eis el vivius - e resignaus eis el morts.

La Dosia ha buca saviu cumprender quei. Ella haveva detg tontas gadas: «Sche mu ju puss muri gl'emprem.» Mo la mort lai buca giavischare cumandar. Restond anavos, ha ei vuliu planisar per il temps vanzont. Enzacons dis eis ella vegnida tgirada da sia feglia Barla, e lu ha ei giu num: serender tier siu fegli Dosi, per en ca. 15 dis prender dimora en la Casa s. Vigeli a Sedrun. Sia davosa staziun terrestra ei stau il spital a Glion, nua ch'ella ha finiu sia veta ils 19 d'uost 1989.

Remarcabel: Il Nazi veva da s'anunziar per la sentupada «Diamant». El veva nuota grond gaudi da quei. Jeu erel presents. La Dosia ha detg: «Te vas sen quei, quai as te schon meritau.» - Tgi vess è detg lu ch'il Nazi füssi lu buca pli en veta. El ei era staus in bien camerat. Quei di, ils 19 d'uost ei stau il di da mort da sia consorta.

Ussa ei la mesa casa dalla posta vita. La casa, sco Pader Baseli Berther scriva, baghegiada dad in Condrau, habitada dil vegl pot da Selva, Martin Felici Schmet, il basat da vart dalla mumma Barla Giger, il bab dalla quala, Gion Giger derivava dad Acla/Medel ei suenter daventau casa da Vigeli Venzin e dil Nazi.

57 onns ha la lètg dils dus consorts cuzzau. Onns da ventira, dad uras levas e bialas, mo era onns da panzieri e lavur. - Il Segner vegli dar la pagaglia per tut e remunerar tut quels che han fatg dil bien a nos defuncts. Els rauassien en la pasch da Diu!